

Месяца иулия в 4-й день

Служба святых царственных мученик: царя Николая, царицы
Александры, царевича Алексия, царевен Ольги, Татианы, Марии,
Анастасии от безбожных власти избиенных

На велицей вечерни

Блажен муж: 1-й антифон. На Господи, воззвах: стихиры на 8, глас

2.

Подобен: Егда от Древа:

Егда на царство Российское венчашеся, помазанниче Николае,/
тогда усердно молился еси:/ Владыко и Господи мой,/ настави мя
в деле, на неже послал мя еси,/ да будет со мною премудрость
Твоя, / да разумею, что есть угодно пред очима Твоима/ и в день
Суда Твоего не постыдно воздам Тебе слово./ Темже не о славе
земной попечение имел еси,/ но паче о славе Небесней.

Егда на святей Руси/ тяжкаго испытания время наста,/ тогда ты,
страстотерпче святой Николае,/ молился еси о спасении ея,/ и се,
явися икона Заступницы Державныя,/ яко знамение приятия
власти/ на пречистей руце Царицы и Владычицы./ Темже
Россия,/ аще и властью безбожных угнетена бысть,/
предстательством Девы Богородицы/ и молитвами твоими
сохранися.

Егда мнози беззаконницы и вожди людстии/ восхотеша востати
на веру, царя и отечество,/ тогда ты, богомудре страстотерпче
Николае,/ болезновал еси о народе твоём/ и Каинова
братоубийства в державе своей избегнути хотя,/ власть земную,
славу и почесть оставил еси,/ все упование возлагая на Бога./
Темже ныне, предстоя Престолу Царя Царствующих/ молися о
державе Российстей/ и спасении душ наших.

Егда наста гонение,/ заточение и поношение,/ тогда твердую
веру,/ надежду на Бога и чистейшую любовь,/ терпение же и
всепрощение покажете,/ святии царственнии страстотерпцы,/
творяще кротко молитвы за враги./ Велие на земли благочестие
ваше,/ велия на Небесех слава ваша.

Ины стихиры, глас 6.

Подобен: Все отложше:

Все упование на Бога возложивше,/ святии царственнии
страстотерпцы,/ образ терпения и страдания/ всей земли
Российстей явистеся./ Вы бо, молящися о мучителех,/ клевету, узы
и изгнание,/ глумление, насмешание и оболгание,/ убиение и телес
поругание/ мужественне претерпели есте./ Сего ради вас присно
прославляем.

Все благочестие твое во Христе бысть, / святая мученице царице
Алексадро Российская, / прешла бо еси от Лютеровы веры к
Православию, / егоже восприяла еси всем сердцем твоим, /
возлюбивши молитву, / храм Божий и святых отец учения, / и, яко
мати добронравная, / во благочестии возрастила еси чада твоя, / и
тыя уготовала еси в непорочную жертву за Христа. / Сего ради ты
присно прославляем.

Плод благославлен / молитв Саровскаго чудотворца / и чаемый наследник царственных родителей быв, / надежда, слава и упование России / в радость людям православным явился еси, / святой царевичу Алексие. / Божиим же промышлением / многия скорби и недуги / измлада безропотно терпел еси / и, яко агнец непорочный, / убиение от злочестивых приял еси, / ныне же ликуеши, яко наследник Царствия Небеснаго. / Сего ради ты присно ублажаем.

Дщери царевы, / святыя мученицы девы, / истинныя невесты Христовы, / Ольго, Татиано, Марие и Анастасие. / Вы, яко мудрыя евангельския девы, / елей милосердия / в душах присно хранящия, / страждущим, нищим и болящим / усердно послужили есте / и, за гонящия вас / даже до смерти Господа молящия, / в чертозах Жениха Небеснаго вселилися есте. / Сего ради вас присно ублажаем.

Слава, глас 6:

Союзом любви Христовы связуеми, / седмочисленнии царственный страстотерпцы, / поношения и убиения не убоявшеся, / первии, яко новомученицы, / за Русь святую от безбожных пострадасте / и образ исповедничества и ревности по Бозе / верным людям покажете. / Темже, Земли Русския / покровителие неусыпаемии явльшеся, / Троидинаго Бога непрестанно молитесь / о спасении отечества нашего / и всех с любовью вас почитающих.

И ныне, глас тойже: Кто Тебе не ублажит:

Вход. Прокимен дне. И чтения три.

Премудрости Соломоновы чтение (глава 3, 1-9):

Праведных души в руке Божией, / и не прикоснется их мука. / Непщевани быша во очесех безумных умрети, / и вменися озлобление исход их. / И еже от нас шествие - сокрушение, / они же суть в мире. / Ибо пред лицом человеческим аще и муку примут, / упование их безсмертия исполнено. / И в мале наказани бывше, / великими благодетельствовани будут, / яко Бог искуси я и обрете их достойны Себе. / Яко злато в горниле, искуси их, / и, яко всеплодие жертвенное, прият я. / И во время посещения их возсияют / и, яко искры по стеблию, потекут. / Судят языком и обладают людьми, / и воцарится Господь в них во веки. / Надеющиеся Нань разумеют истину / и вернии в любви пребудут Ему, яко благодать и милость в преподобных Его / и посещение во избранных Его.

Царств третьих чтение

(глава 8, 22-25, 33-34, 46-49, 57-58 и глава 9, 3-5):

Ста Соломон пред лицом олтаря Господня, / пред всем собором Израилевым и воздвиге руке свои на небо, и рече: / Господи, Боже Израилев, несть якоже Ты Бог на Небеси горе и на земли низу, / храняй завет и милость рабу Твоему, / ходящему пред Тобою всем сердцем своим, / яже сохранил еси рабу Твоему Давиду, отцу моему, / ибо глаголал еси усты Твоими и руками

Твоима совершил еси, якоже день сей./ И ныне, Господи, Боже Израилев,/ сохрани рабу Твоему Давиду, отцу моему, яже рекл еси ему, глаголя:/ не оскудеет муж от лица Моего, седяй на престоле Израилеве,/ токмо аще сохранят чада твоя пути своя, еже ходити предо Мною,/ якоже ходил еси предо Мною./ И услышиши молитву раба Твоего и людей Твоих Израиля,/ о нихже помолются на месте сем,/ и Ты услышиши на месте обиталища Твоего на Небеси,/ и сотвориши и помилуеши./ Елика аще согрешит кийждо ко искреннему своему,/ и аще примет на него клятву, еже кляти его,/ и приидет, и исповесть пред лицом олтаря Твоего в храме сем./ И Ты услышиши от Небесе, и сотвориши суд людем Твоим Израилю,/ осудити беззаконнаго, дати путь его на главу его, и оправдити праведнаго,/ дати ему по правде его,/ егда падут людие Твои Израиль пред враги, яко согрешат Ти,/ и обратятся к Тебе, и исповедятся имени Твоему,/ и помолются и возглаголют молитву к Тебе в храме сем./ И Ты услышиши с Небесе, и милостив будеши о согрешениих людей Своих Израиля,/ и возвратиши я в землю, юже дал еси отцем их, яко согрешат Ти,/ яко несть человек, иже не согрешит,/ и разгневаешия на ня, и предаси я пред враги,/ и попленят их пленящии в землю далече, или близ,/ и обратят сердца своя в земли, аможе преселишася,/ и обратятся, и помолются Тебе в земли преселения своего, глаголюще:/ согрешихом, беззаконновахом, неправдовахом./ И обратятся к Тебе всем сердцем своим и всею душею своею в земли враг своих,/ аможе превел еси их,/ и помолются к Тебе по пути земли своя, юже дал еси отцем их,/ и ко граду, егоже избрал еси,/ и ко храму, егоже создах имени Твоему./ И услышиши от Небесе, от готоваго жилища Твоего, молитву их и моление их,/ и сотвориши оправдание им,/ да будет Господь Бог наш с нами, якоже бе со отцы нашими,/ да не оставит нас, ниже да отвратит нас, преклонити сердца наша к Нему,/ еже ходити во всех путех Его/ и хранити вся заповеди Его и повеления Его и оправдания Его,/ яже заповеда отцем нашим./ И рече к нему Господь:/ услышах глас молитвы твоея и моления твоего,/ имже молился еси предо Мною,/ сотворих ти по всей молитве твоей,/ и освятих храм сей, егоже создал еси,/ еже положити Имя Мое тамо во веки,/ и будут очи Мои ту и сердце Мое во вся дни./ И ты, аще пойдеши предо Мною,/ якоже ходи Давид, отец твой, в преподобии сердца и в правоте,/ и еже творити по всем, яже заповедах ему,/ и повеления Моя и заповеди Моя сохраниши,/ и возставлю престол царствия твоего во Израили во веки,/ якоже глаголах к Давиду, отцу твоему, глаголя:/ не оскудеет ти муж властелин во Израили.

Пророчества Исаиина чтение

(глава 61, 1-3, 10-11 и глава 62, 1-5):

Дух Господень на мне, Егоже ради помаза мя,/ благовестити нищым посла мя,/ изцелити сокрушенныя сердцем, проповедати пленником отпущение и слепым прозрение,/ нареци лето

Господне приятно и день воздаяния,/ утешити вся плачущыя,/ дати плачущим Сиона славу вместо пепела,/ помазание веселия плачущим, украшение славы вместо духа уныния,/ и нарекутся родове правды, насаждение Господне во славу./ Да возрадуется душа моя о Господе,/ облече бо мя в ризу спасения и одеждею веселия одея мя,/ яко жениху возложи на мя венец, и яко невесту украси мя красотою./ И яко земля растящая цвет свой, и яко вертоград семена своя прозябает,/ тако возрастит Господь правду и веселие пред всеми языки./ Сиона ради не умолчу и Иерусалима ради не попущу,/ дондеже изыдет, яко свет, правда моя,/ и спасение мое, яко светило, разжжется./ И узрят языцы правду Твою, и царие славу Твою,/ и прозовут Тя именем новым, имже Господь наименует е./ И будеши венец доброты в руце Господни/ и диадима царствия в руце Бога твоего,/ и не прозовешися ктому оставлен, и земля твоя ктому не наречется пуста,/ тебе бо прозовется воля моя, и земля твоя вселенная,/ яко благоволи Господь в тебе, и земля твоя вкупе населится./ И якоже живяй юноша с девою, тако поживут сынове твои с тобою/ и будет якоже радуется жених о невесте,/ тако возрадуется Господь о тебе.

На литии стихиры, глас 4:

Не прикасайтесь помазанным Моим, / глаголет Господь Вседержитель./ Богопротивницы же Боговенчанного царя убиша / и не наследоваша землю благих,/ но улучиша смерть безконечную. / Ты же, святыи мучениче Николае,/ помазанниче Божий, / моли прилежно о нас, / да наследуим с тобою Царство Небесное.

Совети Божии,/ не суть, яко совети человечестии,/ глаголет Господь Вседержитель, / оваго бо смиряет, оваго же возносит, / оваго же мертвит и оваго живит,/ возставляет от земли убога, / и престол славы дает ему. / Сего ради призре Господь / на смирение возлюбленного помазанника Своего Николая / и жива в Небесных обителех содела Его, / яко да молится о спасении людей своих.

Слава, глас 6:

Егда прииде година лютая / и область темная объят землю Российскую, / тогда явишася избиеннии за слово Божие. / Ты же, царю мучениче, / яко начаток страстотерпцев новых, / с боголюбивою царицею, / царственными чады и верными слуги твоими / любовию взывал еси:/ приидите, принесем себе Богу в жертву живую / и тако веру Православную свидетельствуим, / да Царствия Небеснаго сподобимся.

И ныне, Богородичен:

Богородице, Ты еси Лоза истинная, / возрастившая нам Плод живота, / Тебе молимся,/ молися, Владычице, / с новомученики и царственными страстотерпцы, / помиловати души наша.

На стиховне стихиры, глас 5.

Подобен: Радуйся:

Радуйся, царю Николае, / помазанниче Божий, / Российския

державы хранителю / и веры Православныя благочестивый ревнителю, / о мире всего мира попечителю, / заблуждших истинный вразумителю, / скорбящих, алчущих и страждущих утешителю, / молитвенниче о всех теплейший, / ныне к тебе прибегаем, / Божий угодниче и жертво всеусердная, / моли спастися душам нашим.

Стих: Вознесох избраннаго / от людей Моих.

Радуйся, царю Николае, / Богом от рождества на мучение вольное посвященный, / и, якоже Иов Многострадальный, / праведность во страдании явивый, / ныне же с Небесным Царем царствуй, / молися о державе Российской / и спасении душ наших.

Стих: Елеем святым Моим / помазах его.

Радуйся, страстотерпче Николае, / слава и красота Российских царей и князей, / якоже святии страстотерпцы и мученицы, / Борис, Глеб и Андрей, / от ближних твоих предан быв, / убиение от клятвопреступников безбожных приял еси, / ныне же молишися о прощении врагов твоих, / и спасении душ наших.

Слава, глас 8.

Подобен: О, преславнаго чудесе:

Мучениче царю Николае, / от юности Царя Славы возлюбил еси, / да Ему до смерти последуеши, / якоже Церковь проповедует: / слава Христа Бога, - / Крест и Воскресение. / Ныне же славу небесную от Христа приемый, / приими и ныне земное прославление / и моли спастися душам нашим.

И ныне, глас и подобен тойже:

О, преславнаго чудесе! / Небесе и земли Царица / от святых сродников наших умоляемая / до ныне Землю Русскую покрывает, / и лика Своего изображении милостивно обогащает. / О, Владычице Державная! / Не престани и на будущее время / во утверждение на Руси Православия, / милости и чудеса изливати до века. Аминь.

Тропарь, глас 4:

Днесь, благовернии людие, светло почтим / седмерицу честную царственных страстотерпец / Христову едину домашнюю церковь, / Николая и Александру, / Алексия, Ольгу, Татиану, Марию и Анастасию. / Тии бо, уз и страданий многообразных не убоявшеся, / от богоборных смерть и поругание телес прияша / и дерзновение ко Господу в молитве уллучиша. / Сего ради к ним с любовью возопиим: / о, святии страстотерпцы, / гласу покаяния и стенанию народа нашего вонмите, / землю Российскую в любви к Православии утвердите, / от междоусобных брани сохраните, / мир мирови у Бога испросите / и душам нашим велию милость.

На утрени

На Бог Господь: тропарь мученикам дважды. Слава, и ныне,

Богородичен: Еже от века утаенное:

По 1-м стихословии седален, глас 8.

Подобен: Повеленное тайно:

Попечение имел еси о вере Православней, боговенчанной царю

Николае,/ от апостол Церкви нашей преданней,/ разумея ей быти
Российстей земли утверждением.

Слава, и ныне, Богородичен:

В поношении и обдержании языков есмы, / вси бо преогорчихом
Сына Твоего и Той посети ны прещением Своим,/ но умоли, Дево
Пречистая, от Тебе Рождшагося,/ аще не до конца прогневался
есть,/ да простит и помилует страну Российскую.

По 2-м стихословии седален, глас 8.

Подобен: Премудрости:

Егда богоборцы мучителие заточиша тя с царицею, чады и
верными слуги твоими,/ тогда взывал еси псаломски:/ помяни,
Господи, Давида и всю кротость его./ И послан бысть тебе, царю
Николае, кроткому и смиренному сердцем, венец мученический,/
яко же святым Борису, Глебу и Андрею./ Моли спастися душам
нашим.

Слава, и ныне, Богородичен:

Востани, Владычице Державная, и облечется Русь святая в
крепость свою / и вода желчная от полыни будет нам, яко мед,/ да
напитаемся теснотами, яже от Зиждителя суть, и восхвалим
державу Твою.

Величание:

Величаем Вас,/ святии царственнии страстотерпцы,/ и чтим
честная страдания Ваша,/ яже за Христа / претерпели есте.

Псалом избранный: Бог нам Прибежище и Сила:

По полиелеи седален, глас 3:

Днесь царственнии страстотерпцы Российскойи / предстоят Царю
царствующим и Господу Господствующим / и с Державною
Владычицею непрестанно молят Бога:/ спаси, Господи, люди Твоя
/ и благослови достояние Твое,/ страну нашу Российскую
помилуй./ Милостиве Вседержителю,/ во веки веков. Аминь.

Слава, и ныне, Богородичен, глас тойже:

Вострубим трубою песней, воспоем согласно Царице Богородице:/
радуйся, Заступнице Усердная,/ благоволением Твоим отечество
наше от лет древних покрывающая/ и благодать тому
источающая./ Темже, Тобою хвалящаяся, глаголем:/ Твои бо есмы
раба, да не постыдимся.

Степенна, 1-й антифон 4-го гласа. Прокимен, глас 4: Пролияша
кровь их,/ яко воду. Стих: Вменихомся, яко овцы заколения.

Всякое дыхание: Евангелие от Матфея, зачало 36.

Слава: Молитвами царственных страстотерпец, Милостиве,
очисти: И ныне: Молитвами Богородицы:

По 50-м псалме стихира, глас 6:

Страстотерпче Христов,/ царю Николае,/ по имени твоему житие
твое./ Сего ради врази твои / не возмогоша сокрыти славу твою./
Кроток бысть и молчалив во страданиях твоих,/ прося не мстити
за себе./ Житие твое оклеветано бысть,/ кончина же твоя с
мученики святыми славна./ Моли о душах наших.

Канон царственных мученик, глас 6.

Песнь 1

Ирмос: Волною морскою / Скрывшаго древле гонителя мучителя / под землю скрыша спасенных отроцы, / но мы, яко отроковицы, / Господеви поим, славно бо прославися.

Припев: Святии царственнии страстотерпцы, молитвe Бога о нас. Венченосче Николае, вкупе с мученическими лики, царицею, чады и слуги, / предстояще у Престола Христова, / просвещение нам даруйте, озаряющее душ наших омрачение и нечувствие, / яко да восхвалим радостно вашу блаженную память.

Ныне проречение Саровскаго старца, яко прославльшаго мя прославит Бог, исполнися, / прослави бо Церковь Русская царственнаго страстотерпца. / Темже вкупе с Преподобным молится, во еже стяжати нам благодать Святаго Духа.

Сердце царево в руке Божией, глаголет Господь. / Ты же, истинный помазанниче и слуго Господень, благоговейне рекл еси: / не токмо жизнь моя, но и пути страны Российския в руке Господней суть.

Богородичен: Ты еси крепость наша, / Ты еси похвала и радование, / Предстательница Непобедимая и Покров державный страны Российския, Пресвятая Богородице, / с царственными страстотерпцы и новомученики моли спасти рабы Твоя.

Песнь 3

Ирмос: Тебе на водах, / Повесившаго всю землю неодолимо, / тварь видевши, на лобнем висима, / ужасом многим содрагашеся, / несть свят, / разве Тебе, Господи, взывающи.

Поругание и разорение земли своея от безбожных видя, благочестивый царю, / плакася из глубины сердечныя, яко пророк Иеремя, горце стеньше и моляся за люди согрешившыя: / Милостиве Господи, не остави их, оставльших мя.

На земли алкал и жаждал еси правды Божией, / за нюже душу кротце положил еси, праведне Николае, / обаче в Горнем Царствии насытился еси, / идеже пребываеши во веки.

Врачевания и чудеса точите, святии страстотерпцы, людем, верою к вам притекающим, / темже печаль нашу на радость преложите молитвами вашими.

Богородичен: Прибежище, Вышний Покров Тя имама, Благословенная Мати Божия, / Твоею помощию сохрани и заступи нас, Всепетая.

Седален, глас 4:

Егда мнози от сродник наших отступиша от Бога, / отворишася Божиих заповедей и востаха на Господа и помазанника Его, / тогда гнев Божий на землю Русскую прииде, / иссяче любы многих, пролияся кровь братий наших, / расточишася люди Российстии по всему лицу земли, / храмы наши поруганию предашася, / глади, нашествия иноплеменник постигоша ны и быхом в посмеяние языков. / Мы же, разумеюще сие, с сокрушением сердца в покаянии зовем: / прости и помилуй нас, Господи, по велицей милости Твоей, / очисти беззакония наша / и

подаждь страждущей стране Российстей предстательством
царственных страстотерпец прощение грехов, мир и велию
милость.

Слава, и ныне, Богородичен:

Умоли, Милосердая Мати Света, Сына Твоего и Бога нашего,/ о
еже возставити державу нашу православную,/ сохранить ю в мире
и благоденствии,/ избавити ны от междоусобных брани,/
укрепити Святую Церковь и оградити ю от неверия, раскола и
ересей.

Песнь 4

Ирмос: На Кресте Твое божественное истощание / провидя
Аввакум, ужасся, вопияше:/ Ты сильных пресека еси державу,
Блаже,/ приобщаяся сущим во аде, яко Всесилен.
Нищетою духовною обогатился еси, святе Николае,/ и сотвори тя
Господь достойна не токмо земнаго, но и Небеснаго Царствия.
Скорбию обдержимь бысть, венценосче Николае,/ зря ослепление
народа твоего,/ отрекшагося от Царя Небеснаго, такожде же и
земнаго.

Мужественне возложив упование на Бога в многострадальном
земном служении твоём, якоже Иов иногда,/ сторицею воздаяние
приял еси на Небесех,/ идеже ныне наслаждаешься, царственный
мучениче.

Богородичен: Милосердия двери, Благословенная Богородице,
отверзи нам,/ да избавимся от бед и озлобления нашего,/ во еже
пети Тебе непрестанно:/ Ты еси спасение рода христианскаго.

Песнь 5

Ирмос: Богоявления Твоего, Христе,/ к нам милостивно
бывшаго,/ Исаия, свет виде не вечерний,/ из нощи утренавав,
взываше:/ воскреснут мертвии и востанут сущии во гробех,/ и вси
земнороднии возрадуются.

Миротворец явился еси, царю Николае святой, неся мир миру,/
спасая и защищая тысячи во отечестве твоём и в иных странах,/
сего ради сыном Божиим, по слову Господню, нареклся еси.
Изгнание, поношение, гонение, и всяк глагол ложный, на вы
реченный,/ претерпесте, святии царственнии мученицы./
Радуйтеся убо и веселитесь, яко мзду вашу на Небеси приясте.
Служителие беззакония тайнаго,/ венец терновый сплетше,
возложиша на тя, царственная главо,/ обаче дерзостная дела их
погибоша яве.

Богородичен: В тину грехов впали есмы/ и люте потопа ны буря
прегрешений./ Но, яко рождающая Спаса, Владычице, призри на ны,
рабы Твоя,/ и избави от страстей душевных.

Песнь 6

Ирмос: Ят бысть,/ но не удержан в персех китовых Иона,/ Твой бо
образ нося, страдавшего и погребению дававшегося,/ яко от чертога,
от зверя изыде;/ приглашаше же кустодии, хранящие суетная и
ложная,/ милость сию оставили есте.

Всем православным заступник был еси, Богоизбранный Николае,/

народом Словенским защиту благую являяй и яко брат брату помагаяй.

О, сыне верный Святыя Церкви!/ Ты ревнитель прославления святых явился еси,/ храмов созидатель, святых обителей благоуокраситель,/ Святыя Земли и Горы Афонския благотворитель,/ просвещения православнаго попечитель и монашества покровитель.

В житии вашем и в делах любве образ христианом бысте, Боговенчаннии царице Николае и Александро,/ полагасте бо во главу угла Камень - Христа, Бога нашего.

Богородичен: К Тебе прибегаем, Царице Державней, верных Покрове,/ на Тя надежду возлагаем спасения нашего,/ Пресвятая Владычице Богородице, не презри нас.

Кондак, глас 8:

Избраннии Царем царствующих и Господем господствующих/ от рода царей Российских,/ благовернии мученицы,/ муки душевныя и смерть телесную за Христа приимшии,/ и венцы небесными увенчавшиися,/ к вам, яко покровителем нашим милостивым,/ с любовью благодарне вопием:/ радуйтесь, царственнии страстотерпцы,/ за Русь Святую пред Богом усерднии молитвенницы.

Икос:

Славою и богатством благочестия сияющи,/ багряницею многоценною и венцем украшеннии,/ милостию и правдою в житии просиявшии,/ веру, надежду и любовь к Богу до конца явили есте./ К вам, яко покровителем нашим милостивым,/ с любовью благодарне вопием:/ радуйтесь, царственнии страстотерпцы,/ за Русь Святую пред Богом усерднии молитвенницы.

Песнь 7

Ирмос: Неизреченное чудо,/ в пещи Избавивый преподобныя отроки из пламене / во гробе мертв бездыханен полагается,/ во спасение нас, поющих:/ Избавителю, Боже, благословен еси. Яко присных ваших, недужных воинов чадолюбне посещаете, царственнии мученицы,/ и с любовью их утешаете,/ места же их упокоения слезами вашими орошаете.

Вы есте образ супружества добродетельнаго и детей воспитания благочестиваго,/ святии царице Николае и Александро./ Дом ваш, яко цветник духовный, соделавше,/ на Небесех ныне вкупе со чады ликуете.

На высоте славы человеческия пребывая,/ о Небесных присно помышляя еси, царю Николае,/ аможе устремися душа твоя святая.

Богородичен: Всесвятая Владычице,/ оживи ум наш, умерщвленный страстьми многими,/ и укрепи ны богоугодная творити,/ да величаем Тя яко Заступницу рода христианскаго.

Песнь 8

Ирмос: Ужаснися, бояйся, Небо,/ и да подвижатся основания

земли,/ се бо в мертвецех вменяется в Вышних Живый/ и во гроб мал странноприемлется./ Егоже, отроцы, благословите,/ священницы, воспойте,/ людие, превозносите во вся веки. Егда угодницы Божии предрекоша вам путь мученический, якоже Павлу пророк Агав,/ вы, царственный страстотерпцы, не уклонитесь ни одесную, ни ошуюю,/ но мужественне проидосте его,/ взирающе на Совершителя веры Иисуса Христа. Во страданиях ваших, страстотерпцы святии,/ не отвергостесь Пути, Истины и Живота, Христа Бога нашего,/ не устрашитесь богоборцев,/ но в терпении шествовасте царским путем в жизнь вечную.

Увы нам, отеческия заветы поправшим,/ от обета верности царскому роду, Церквию Святою благословенному, отступльшим,/ и тако от пути Божия отлучившимся./ Прости нас, Господи, за вся сия содеянная / и помилуй молитвами святых страстотерпец.

Богородичен: Заступницу нашу Тя вемы, Богородице,/ непрестанно бо о нас молишися,/ во еже покаяться и исправитися нам, Упование и Прибежище душ наших.

Песнь 9

Ирмос: Не рыдай Мене, Мати,/ зрящи во гробе,/ Егоже во чреве без семени зачала еси Сына,/ встану бо и прославлюся / и вознесу со славою, непрестанно яко Бог,/ верою и любовию Тя величающия.

Да воскреснет Русь Святая молитвами царственных страстотерпец и новомученик Твоих, Господи,/ и да расточатся вси врази ея вскоре,/ и от лица ея да бежат вси ненавидящии ю отныне и до века.

Все упование на Господа возложи державный царь наш./ Такжеже и мы со упованием Господу помолимся,/ да укрепит Он молитвами Богородицы и царственного страстотерпца страну нашу в Православии и спасет души наша.

Яко достойное пение, примите, святии страстотерпцы, малое моление сие,/ и якоже Христос прият вдовицы две лепте,/ не возгнушайтесь нас, окаянных,/ страстьми обуреваемых, убогих читателей и служителей ваших.

Богородичен: Державным Твоим покровом, Чистая,/ рабы Твоя сохрани вся невредимы:/ Тя бо едину имамы Прибежище в нуждах, утешение в скорбех и Победу во бранех наших.

Светилен:

Невечернему Свету предстояще, страстотерпцы святии царственный, с мученическими лики,/ во испытаниих не оставляйте ны молитвами вашими.

Слава, и ныне, Богородичен:

Рождшая Свет Незаходимый, просвещающий сидящих во тьме неведения и прелести,/ озари и нас, грешных, светом Сына Твоего. На хвалитех стихиры на 4, глас 8.

Подобен: О, преславнаго чудесе:

О, преславнаго чудесе! / Святии царственнии страстотерпцы седмочисленнии, / в годину страданий за Христа / сохраниша любовь и верность Ему / друг друга тяготы носяще, / и тако исполняюще закон Его, / сего ради ныне на Небеси царствуют / и дерзновенно молятся / о спасении душ наших.

О, Боговенчаный царю Николае, / славный слуго Святыя Церкви, / хранителю ея и защитителю, / избранный Богом ея покровителю, / Великаго Иустиниана подобиче, / вонми гласу моления нашего, / прости, защити и укрепи / заблудших чад твоих, / да верою и любовию прославим Прославльшаго тя.

О, преславнаго чудесе! / Святая мученица Александра, / в горцем заточении от богоборцев бывши / и чающи смерти за Христа, / вкупе с четверицею дев мудрых – дочерей своих / се, Жених грядет, глагола. / Уготовим светильники своя, / да внидем в чертог Его / и облечемся вси одеждею славы Его.

О, благоверный царевичу Алексие, / во смирении сердца ты глаголал еси: / вегда мне царствовати, / да не обрящутся нищии и убозии. / Егда же крестным путем жития твоего / и мученического твоею кончиною / в Царство Небесное возшел еси, / идеже имея дерзновение велие, / молишися о всех, требующих твоея помощи.

Слава, глас тойже:

О, святая седмица царственных страстотерпец, / Христова похвало и славо! / Соизволением Отца Безначальнаго, / совершением Сына Единороднаго / и содействием Святаго Духа / мученицы за веру покажутся / и Царствия Божия причастницы соделаетесь. / Примите покаяние наше / и молитве Троицаго Бога / страну нашу Российскую / в Православии и единомыслии неколеблему сохранить / и спасти души наша.

И ныне, глас тойже.

Подобен: О, преславнаго чудесе:

О, преславнаго чудесе! / Небесе и земли Царица / от святых сродников наших умоляемая / до ныне Землю Русскую покрывает, / и лика Своего изображении милостивно обогащает. / О, Владычице Державная! / Не престани и будущее время / во утверждение на Руси Православия, / милости и чудеса изливати до века. Аминь.

На Литургии

Блаженны на 8, песни 3-я и 6-я. Прокимен, глас 7: Господи, силою Твоею возвеселится царь / и о спасении Твоем возрадуется зело.

Стих: Желание сердца его дал еси ему / и хотение устну его неси лишил его. Апостол к Римляном, зачало 99. Аллилуия, глас 1.

Стих: Яко царь уповае на Господа и милостию Вышняго не подвижится. Стих: Вознесися, Господи, силою Твоею, воспоем и поем силы Твоя. Евангелие от Иоанна, зачало 52. Причастен: Господи, спаси царя и услыши ны, вонже аще день призовем Тя.

Молитва

О, святой страстотерпче царю мучениче Николае! Господь тя избра помазанника Своего, во еже милостивно и право судити

людем твоим и хранителем Церкви православныя быти. Сего ради со страхом Божиим царское служение и о душах попечение совершал еси. Господь же, испытав тя, яко Иова Многострадальнаго, попусти ти поношения, скорби горькия, измену, предательство, ближних отчуждение и в душевных муках земнаго царства оставление. Вся сия ради блага России, яко верный сын ея, претерпев, и, яко истинный раб Христов, мученическую кончину приемь, Небеснаго Царства достигл еси, идеже наслаждаешися Вышняго славы у Престола всех Царя, купно со святою супружницею твоею царицею Александрою и царственными чады Алексием, Ольгою, Татианою, Мариєю и Анастасиею.

Ныне, имея дерзновение велие у Христа Царя, моли, да простит Господь грех отступления народа нашего и подаст грехов прощение и на всякую добродетель наставит нас, да стяжим смирение, кротость и любовь, и сподобимся Небеснаго Царствия, идеже купно с тобою и всеми святыми новомученики и исповедники Российскими прославим Отца и Сына и Святаго Духа, ныне, и присно, и во веки веков. Аминь.